

經義考

冊九

三教圖

卷一

經義考卷六十一

秀水 朱彝尊 編

男 昆田 校

易六十

劉氏宗周周易古文鈔

三卷

讀易圖記

一卷

存

易衍

未見

宗周自述曰周易者文王本伏羲畫卦而爲之繫彖辭周公又繫
爻辭而得各也至夫子乃繫彖傳及大小象傳則傳體也合之皆
得稱周易然三家次第本是秩然後人混而錯之遂令古文不傳
於世幸乾卦尙存古文之舊今姑推其例以及其餘一一爲之更
定凡爲經二卷夫子繫辭傳仍載後如舊

陸元輔曰山陰劉念臺先生中萬曆辛丑進士仕至都察院左都

御史聞南京不守不食死

薛氏三省易蠡

二卷

存

黃百家曰公字魯叔號天谷定海人萬曆辛丑進士歷官南京禮

部尙書卒諡文介

程氏汝繼周易宗義

十二卷

存

朱之蕃序曰往歲辛卯蕃偕程敬承及諸同志邂逅於天界禪林
方以易學應制舉咸嘆其微詞奧旨非一經生家言所能殫究安
得彙輯諸家講解參酌採錄務得其旨趣曲暢旁通而覽者不苦
其玄奧難窮龐雜無統斯亦一代之鴻裁非積累歲月未可幾已
敬承氏旣成進士宰劇邑此念未嘗少忘比擢南曹乃得乘其政
暇羅列諸家之說不泥古不執今句櫛字比必求其融會貫通可
安於吾心以契諸人心之所共安而後錄之各標姓氏不敢襲爲
己之獨見也參舉所長不忍廢人之成說也敬承氏可謂任一人

以勞貽衆人以逸役三載之神成千秋之業者矣孟氏有言經正則無邪慝此書之流布於世其所關係豈淺鮮哉

黃虞稷曰汝繼字志初婺源人萬曆辛丑進士官袁州府知府

王氏三善周易象注

九卷

存

曹溶曰王三善字彭伯永城人萬曆辛丑進士累官右僉都御史巡撫貴州死寇難贈兵部尙書

魏氏濬周易古象通

八卷

存

王在晉序曰易義古象通建溪蒼水魏公所論述也公於易道有深契合元會運世之終以觀無始邈天地人物之始以極無終一理渾涵散殊萬象萬象歸根統會一理故曰理無形也假象以顯聖人開物成務見天下之蹟以擬形容象萬宜故謂之象然非自聖人始也河出圖洛出書顯然以象示矣又非自圖書始也太極分陰陽陰陽分動靜兩儀四象八卦漸次而生又顯然以象示矣

一奇一偶而天下之萬象生焉一奇一偶之變而天下之萬變生焉變者生乎象者也通者生乎變者也天地間自然之易爲象無象不可以言易天地間自然變易之理爲通無通不可以言象聖人觀會通以行典禮通其變以成天地之文使民不倦變則通通而後能久恆久不已而天地萬物之情見矣此易古象通所由述也昔呂東萊氏存古易十二篇紫陽氏因之魏公之存古象也漢魏晉唐諸家之說具在後有作者百世不能易矣

黃虞稷曰濬字蒼水松谿人萬曆甲辰進士累官都察院右僉都御史巡撫湖廣書八卷前有明象論八篇

樊氏良樞易疑

一卷

存

易象

二卷

存

朱謀瑋序曰說易者不難於得理而難於得象不難於六十四卦三百八十四爻而難於十翼夫河圖四象天文也六十四卦三百

八十四爻人文也伏羲則四象而卦之天文昭矣周文王彖而爻
之人文昭矣然而微言妙理察乎天人之際非有尼父大聖極深
研幾以作十翼其孰能通之者乎自漢以來說易者無慮百家鄭
虞求象而不得則爲支離荒怪之言以炫惑學者王輔嗣疾其誣
誕而以義理勝之至於十翼則一字不敢措手豈以尼父文章高
深不可得而聞乎夫十翼者大易之門戶大聖人三絕韋編之所
得也入其門升其堂而後可以入室今舍十翼而躡等以生義多
見其不知量也學使樊致虛先生窮六經之奧有非唐宋諸儒所
能及者於河洛象數尤極其精作易象八卷有圖有贊有說陰陽
造化之理天人性命之學思入微渺若有神助昔尼父以十翼贊
文王之所未備今學使又以易象贊十翼之所欲言千載蔀覆一
旦發明使學易者由易象以達十翼由十翼以通周易其於聖門
紹述之功豈不大哉不佞少而好易潛心四十餘年嘗作易通八
卷僅存訓詁而已至於象數之妙百不得一讀學使所著如飲上
池之水見垣一方人五苦六辛霍然在目矣天啓四年歲次甲子
仲春

夏樞後序曰易之爲教也曰通志曰斷疑既通矣曷云疑吾所謂

疑非稽疑也義文之義既不可窺吾求之十翼而不得遍求之說
易之家疑其誕且枝也疑而思問不敢謂能疑爲明也既疑矣又
曷云通吾所謂通非能神而明之也通其變可以成文通其意可
以精義通其象而天地鬼神之奧君民事物之蹟五官百體之動
鳥獸草木之名金木水火土穀之用禮樂刑政之屬不勝窮矣夫
易開物成務之書也吾患夫學易者之不通於物務也卽其象辭
引而伸之以通於史可以彰往卽可以知來可以準古亦可以酌
今庶乎存疑而得解觀會以求通是易之爲民用也吾苟能前用
之雖以通天下之志斷天下之疑可也此斷疑象通之所以述也
易贊

二卷

未見

陳繼儒序曰豫章致虛樊使君精於易其學傳之梁上老人老人
君祖也年七十猶纂易傳義手觸寒暑細書盈帙夜則坐使君燈
下授之使君以明經得通籍而老人學易至九十不少衰使君衍
而廣之遂成一家言所爲易贊大抵義多者約之使少理幽者張
之使著辭簡韻雋惟京房焦贛之衍繇東方生管輅之射覆差足

以當之漢儒之易率門生弟子更相學習罕有家傳家傳莫盛於仲翔虞氏零陽太守光授之平輿令輿令授鳳凰授歆歆授翻五世受易爲孔融陸續所推重翻講論於戎馬之上而使君習經於簿書期會之間其苦心好學同也余遇使君於西湖其氣靜幽而清審非有道不能今而後知其發寤於易者深也

陸元輔曰良樞字致虛進賢人萬曆甲辰進士累官廣東右布政高氏捷易學象辭二集

十二卷

存

蔡復一曰菑川大行高君著易學象辭二集以苦思入懸解其辭則蒼傳注諸家疏擇采削附己意以爲發明尤潛觀於陰陽消息盈虛進退離合之際以變動不居爲宗而不執於一局非博通深詣者不能也

黃虞稷曰高捷字中白淄川人萬曆甲辰進士官至河南按察副使

陸氏振奇易芥

十卷

存

浙江新志陸振奇字庸成錢塘人萬曆丙午舉人

葛寅亮曰亡友庸成易芥不執象亦不執理

鄭之惠曰陸庸成爲諸生時著易芥八卷丙午庸成舉孝廉未及上公車卽世庸成故工逢掖棄而所爲易芥獨不爲逢掖言

宿氏夢鯉易纂

未見

嚴繩孫曰夢鯉字龍吉無錫人萬曆丙午舉人松陽知縣學者稱

仁寰先生

楊氏瞿崧易林疑說

十卷

存

黃鳳翔曰穉實易林疑說采撫詳而考訂覈如謂九疇子目脗合河圖則取諸胡方平謂洛書可以敘疇亦可以畫卦則取諸陳器之皆非創己見爲臆說者至於橫圖圓圖逆數順數與夫五行之推遷生剋縱橫錯綜左右逢源尤超然言詮象數之外

黃虞稷曰楊瞿崧字穉實晉江人萬曆丁未進士歷官江西提學

副使

王氏納諫周易翼注

三卷

存

黃願素曰五經之教莫精於易乃依象守筌撫言竄句以副帖括則是五經之學莫輟於易也吾友觀濤王君精易理言簡而便理約而精宜公之學易者

高佑鉅曰納諫字聖俞號觀濤江都人萬曆丁未進士除行人歷吏部稽勳司員外郎

陸氏夢龍易略

三卷

存

陸鳴勳序曰漢魏晉宋諸儒論易或言象數或言占驗或言卦氣或言理解或言圖學以至吞爻折角之家縮桶賣漿之士推演師說言人人殊學者如游溟渤亡津梁汎汎然流轉而無所適從則要略不精而指歸未定也君啓先生盡屏衆說於潔靜精微之中有廣大悉備之蘊昔楊雄之瑩玄也曰不約則其指不詳不要則

經

義

考

卷六十一

五 中華書局聚

其應不博不渾則其事不散不沉則其意不見合數言而易略之蘊可見矣

黃虞稷曰山陰陸公夢龍字景鄴萬曆庚戌進士累官廣東按察使降補河南布政司參議尋備兵固原崇禎七年死寇難贈太僕寺卿諡忠烈

文氏

翔鳳邵窩易詁

一卷

存

李因篤曰先生字太青西安三水人萬曆庚戌進士南京光祿少卿

翔鳳自述曰邵子安樂窩在天津之畔乎屢以祀謁先天堂則登皇極之臺北眺邛洛南揖嵩伊想見皇帝王伯雪月風花之襟聊爲從者繹河圖洛書象數之略云

卓氏

爾康易學全書

五十卷

存

錢謙益志墓曰去病姓卓氏名爾康杭之塘西里人萬曆壬子舉

鄉書授祥符教諭入爲國子學錄轉兵部司務陞南京刑部主事
工部屯田司郎中左遷常州府簡較徙大同推官移兩淮運判作
易學五十卷詩學四十卷春秋辯義四十卷

林氏齊聖易編

未見

齊聖自序曰易有聖人之道四首曰以言者尙其辭故得其辭不
達其意者有之未有不得其辭而能通其意者予今所習辭也觀
玩之餘手編成帙畫而後彖彖而後爻爻而後傳總一篇之要旨
彙四聖之大全至如上傳下傳之參合正解覆解之羣分時或出
自己意總期不詭於聖經若夫因文見道因其可傳以索其不可
傳者象外之意畫前之易不言而會諸心則是集也又寧徒以其
辭而已哉

高兆曰林齊聖字司一莆田人萬曆壬子舉人官同知

繆氏昌期周易會通

十二卷

存

張雲章曰公江陰人萬曆癸丑進士歷官左春坊左諭德殉璫難

贈詹事諡文貞其書弟子饒秉鑑等所述

羅氏喻義讀易內篇問篇外篇

共七卷

存

喻義總序曰往官南中有讀易內外二篇山中晏坐或日說數卦或數日一卦當其領解欣然獨笑家人問之不以告也初有卷如指漸大如觚乃撰定諸篇內篇爲上問篇爲中外篇爲下

又序內篇曰易用二玄用三皇極經世用四潛虛用五經世學易潛虛學玄而玄不敢望易用三者圓用二者方也理至圓也喻如流珠惟方者可以奠之書曰地平天成此之謂易雖然方畫既嗽妙在無方故十翼所繫皆圓義也嘗取二畫規而圓之以著其旋之義而往來下上活潑潑地嗚呼可以觀矣內篇約略言之其解剝文義在問篇

又序續內篇曰歲庚辰天子居門之月深夜春寒剪燈閒語客問余內篇三圖余爲畫爐灰詮解指明客以爲佳宜別作圖余亦欣然相與共營之其斜界一綫道庶幾剖破混沌凡圖一首繫若干言仍附諸內篇

又序問篇曰讀易問篇設客難而應之客曰卦有單複爻有順逆九師以來未之聞也惟子內篇言之何以爲卦有單複也曰易自有之人未之玩耳卦有單複卽圖之對者是也邵子詩曰天地定位否泰反類山澤通氣咸損見義雷風相薄恆益起意水火相射既濟未濟四象相交成十六事八卦相盪爲六十四故易者博易之義東西互換往來不窮者也何獨於乾坤疑之請觀同人師同者類族而有伏莽乘墉之事師者臨戎而有丈人弟子之名卦在此辭在彼也客曰唯唯何以爲爻有順逆也曰爻有順逆卽圖之反者是也易緯曰卦者掛也垂掛物象以示人也固有一正一反之事矣易繫之撰爻也曰其初難知其上易知本末也爻固有本末也曰雜物撰德非中爻不備爻固有中也曰二多譽四多懼三多凶五多功爻固以二五爲中也故順不過五逆不過二以就中焉而卦以成又寬立一爻爲之地則本末具矣當其正也初辭擬之卒成之終及其反也卒反在下初反在上請觀損益損下益上損也至五或益之十朋之龜而益成矣損上益下益也至二或益之十朋之龜而益成矣舍所益之初上不繫而繫二五且以知上之无位也故夫剛柔相易者卦也上下无常者爻也對者言乎其

變也反者言乎其動也變動不居者易之道也乃徧及易象對體六十四卦其合三十二反體十有八其別三十是爲問篇

又序外篇曰讀易外篇不經不傳自爲一家興於天啓末造子屬嬰世患退而學易庶幾同死生之變以无怵惕於胸中爾時予乃或言不及易中事而一皆易中事百物不廢易之道也古无其書聊以當一丸弄之以頗涉方外題曰外篇

張雲章曰喻義字禹鐘號莢江益陽人萬歷癸丑進士官至戶部侍郎讀易二篇各自有序大抵言剛柔相易之義而問篇爲詳曰卦有單複爻有順逆單複卽圖之對者順逆卽圖之反者對者言乎其變也反者言乎其動也變動不居易之道也

程氏玉潤周易演音

六十五卷

存

林增志曰玉潤字鉉吉正叔夫子裔也冠進賢後不數年輒隱去取易象反覆諦思暢正叔微旨成一家言豈非子程子順孫也與倪長珩曰程鉉吉先生以進士爲郎中歲輒引退潛心易學取正叔先生傳而益廣之爲演旨接數百之祀而全一家之說

陸元輔曰玉潤常熟人萬曆癸丑進士

俞氏士瑛周易眇說

佚

葉向高志墓曰君諱士瑛字子偉新會人萬曆癸丑進士甫登第而歿所著有周易眇說

姜氏山斗大易闡庸

三十卷

未見

陸元輔曰山斗字文河直隸通州人萬曆乙卯舉人

馮氏洪業易羨

六卷

未見

高佑鉞曰洪業字茂遠平湖人萬曆乙卯舉人

錢氏士升易揆

十二卷

存

許譽卿序曰四經皆有定論易不可以定論非不可定至定者存